

Sommaire

1. Ouverture de la séance publique

M. Claude Wiseler, Président

p. 14

2. 8524 – Projet de loi portant modification :

1° de la loi modifiée du 16 avril 1979 fixant le statut général des fonctionnaires de l'État ;

2° de la loi modifiée du 24 mars 1989 sur la Banque et Caisse d'Épargne de l'État, Luxembourg ;

3° de la loi modifiée du 25 mars 2015 déterminant le régime et les indemnités des employés de l'État,

en vue de la mise en œuvre des points 3 et 4 de l'accord salarial dans la Fonction publique du 29 janvier 2025

p. 14

Rapport de la Commission de la Fonction publique : M. Maurice Bauer

Discussion générale : M. Maurice Bauer | M. Gusti Graas | M. Ben Polidori | M. Michel Lemaire | Mme Djuna Bernard | M. David Wagner

Prise de position du Gouvernement : M. Serge Wilmes, Ministre de la Fonction publique | M. Ben Polidori (parole après ministre)

Vote sur l'ensemble du projet de loi 8524 et dispense du second vote constitutionnel

3. 8541 – Projet de loi portant modification :

1° de la loi modifiée du 16 avril 1979 fixant le statut général des fonctionnaires de l'État ;

2° de la loi modifiée du 25 mars 2015 fixant les conditions et modalités de l'accès du fonctionnaire à un groupe de traitement supérieur au sien et de l'employé de l'État à un groupe d'indemnité supérieur au sien,

en vue de la mise en œuvre des points 11 et 13 de l'accord salarial dans la Fonction publique du 29 janvier 2025

p. 16

Rapport de la Commission de la Fonction publique : M. Georges Mischo

Discussion générale : M. Georges Mischo | M. Gusti Graas | M. Ben Polidori | M. Michel Lemaire | Mme Djuna Bernard | M. David Wagner

Prise de position du Gouvernement : M. Serge Wilmes, Ministre de la Fonction publique

Vote sur l'ensemble du projet de loi 8541 et dispense du second vote constitutionnel

4. Interpellation de M. David Wagner sur les conditions de travail dans l'enseignement fondamental

p. 18

Exposé : M. David Wagner (dépôt des motions 1 et 2)

Débat : M. Ricardo Marques | Mme Barbara Agostino | Mme Francine Closener | M. Fred Keup | M. Meris Sehovc (intervention de M. Fred Keup) | M. Sven Clement

Prise de position du Gouvernement : M. Claude Meisch, Ministre de l'Éducation nationale, de l'Enfance et de la Jeunesse | Mme Francine Closener (parole après ministre) | M. le Ministre Claude Meisch | M. David Wagner (parole après ministre) | M. le Ministre Claude Meisch | M. Meris Sehovc (parole après ministre) | M. le Ministre Claude Meisch

Motion 1 : Mme Francine Closener | M. Sven Clement | M. Fred Keup | M. David Wagner | Mme Barbara Agostino

Vote sur le renvoi de la motion 1 en commission (adopté)

Motion 2 : Mme Francine Closener | M. Sven Clement | M. Meris Sehovc | Mme Barbara Agostino | M. Fred Keup | M. David Wagner

Vote sur la motion 2 (rejetée)

5. 8710 – Proposition de modification du Règlement de la Chambre des Députés modifiant le statut des fonctionnaires de la Chambre des Députés

p. 30

Rapport de la Commission du Règlement : Mme Sam Tanson

Vote sur la proposition de modification du Règlement de la Chambre des Députés 8710

Présidence : M. Claude Wiseler, Président ; M. André Bauler, Vice-Président

Au banc du Gouvernement : M. Claude Meisch, M. Serge Wilmes, Ministres

(La séance publique est ouverte à 09.01 heures.)

1. Ouverture de la séance publique

M. Claude Wiseler, Président | Ech maachen d'Sëtzung op.

2. 8524 – Projet de loi portant modification :

1° de la loi modifiée du 16 avril 1979 fixant le statut général des fonctionnaires de l'État ;

2° de la loi modifiée du 24 mars 1989 sur la Banque et Caisse d'Épargne de l'État, Luxembourg ;

3° de la loi modifiée du 25 mars 2015 déterminant le régime et les indemnités des employés de l'État,

en vue de la mise en œuvre des points 3 et 4 de l'accord salarial dans la Fonction publique du 29 janvier 2025

D'Sëtzung vun de Moie fänke mer mam Projet de loi Nummer 8524 un iwwert d'Emsetze vun de Punkten 3 a 4 vum Accord salarial am ëffentlechen Déngscht vum 29. Januar 2025. D'Riedezäit ass e Basismodell, dat heescht, de Rapporteur huet 10 Minutten, all Fraktiounen a Sensibilitäten hu 5 Minutten, d'Regierung huet 10 Minutten. Et hu sech schonn ageschriwwen: den Här Maurice Bauer, den Här Gusti Graas, den Här Ben Polidori, den Här Michel Lemaire, d'Madamm Djuna Bernard an den Här David Wagner. An d'Wuert huet elo de Rapporteur vum Projet de loi, den honorabelen Här Maurice Bauer. Här Bauer, Dir hutt d'Wuert.

Rapport de la Commission de la Fonction publique

M. Maurice Bauer (CSV), rapporteur | Merci, Här President. Léif Kolleginnen a Kollegen, et ass mer haut de Moien eng grouss Freed, Iech als Rapporteur de Projet de loi 8524 virzestellen an domadder eng weider Ëmsetzung vum Gehälteraccord vum Januar 2025, mat de Punkten 3 a 4.

De Gesetzesprojet 8524 gouf de 4. Abrëll 2025 vum Minister fir d'Fonction publique Serge Wilmes an der Chamber deposiert. De Gesetzesprojet gouf de 24. Abrëll 2025 un d'Commission de la Fonction publique verwisen.

D'Chambre des Fonctionnaires et Employés publics huet de 16. Abrëll 2025 hiren éischten Avis ofginn. Duerno huet de Staatsrot säin Avis de 7. Oktober d'lescht Joer ofginn.

De 24. November 2025 gouf déi éischte Kéier en Amendement gouvernemental ofginn an d'Chambre des Fonctionnaires et Employés publics huet e complementairen Avis den 12. Dezember 2025 eragereecht, iert eng Woch duerno den 19. Dezember de Staatsrot och e complementairen Avis eragereecht huet.

Doropshin ass de 5. März 2026 en Amendement gouvernemental eragereecht ginn. Den 11. März huet d'Staatsbeamtekummer en zweeten Avis complémentaires ofginn an den 21. Abrëll elo huet de Staatsrot nach en Avis och zu dësem Projet de loi eraginn.

D'Commission de la Fonction publique huet de Gesetzesprojet bei hirer Sëtzung de 26. März dëst Joer virgestallt kritt. An an där selwechter Sëtzung huet d'Kommissioun déi verschidden Avice vum Staatsrot,

d'Avice vun der Staatsbeamtekummer an d'Amendement-gouvernementallen iwwerpréift.

Den 23. Abrëll finalmente huet d'Kommissioun de leschten Avis vum Staatsrot gepréift an de virleiende Rapport och ugeholl.

De Gesetzesprojet ziilt drop of, d'Punkten 3 a 4 aus dem leschte Gehälteraccord vum 29. Januar 2025 ëmzesetzen. Engersäits geet et drëms, dass duerch dëse Gesetzesprojet d'Staatsemployéen an Zukunft net no 20 Joer oder mat 55 Joer an de Pensiounsregimm vun de Fonctionnairen komme sollen, mee schonns no 12 Joer oder mat 55 Joer. Anerersäits geet et drëms, dass d'Staatsemployéen net wéi bis elo no 15 Joer, mee an Zukunft no 10 Joer kënnen fonctionnariséiert ginn, also Fonctionnaire kënnen ginn.

Déi estiméiert Käschte vun dëser Ëmsetzung leie bei järeleche 7,5 Milliounen Euro fir de Punkt 3 an 215.000 Euro fir de Punkt 4.

Erlaabt mer, nach kuerz op d'Avice vun dem Staatsrot a vun der Staatsbeamtekummer zu dësem Projet de loi anzegoen. Dobäi ass ze soen, dass initial virgesi war, dass bei dësem Projet de loi eng weider Ännerung sollt mat ëmgesat ginn. Dëst war, aus der Siicht vum Ministère fir d'Fonction publique, fir eng gewëssen Ongerechtegkeet aus der Welt ze schafen.

Dëse Punkt ass awer no Récksprouch mat der Chambre des Fonctionnaires et Employés publics wéi awer och mat der CGFP aus dem Projet de loi erausgeholl ginn, dëst, well d'Suerg bestanen huet, dass bei den Employéen, déi no 10 Joer fonctionnariséiert ginn, um Niveau vun de Sproochen d'Verlaange vun den dräi Sproochen net méi géif bestoe bleiwen, mee just

Lëtzebuergesch misst op engem gewëssenen Niveau bewise ginn. Och dem Staatsrot no, wéi si an hirem éischten Avis geschriwwen hunn, war dës Punkt net ganz kloer.

Mat engem Amendement gouvernemental sollt dës präziséiert ginn. Konkreet ass et drëms gaangen, präzis spezialiséiert Profiller, wéi zum Beispill Informatiker, ze rekrutéieren. Hei sinn haut scho vill Ministèren a Verwaltungen dacks op d'Mataarbecht vu Bierger aus dem Ausland ugewisen.

Dës Proposition huet awer fir Diskussiounen a Bedenke gesuergt. Souwuel d'Berufskummer wéi och de Staatsrot hunn hir Suergen an de verschiddenen Avisen ausgedréckt, datt dës Ausnameregell eng Dier fir eng generell Ofschwächung vun der Dräisproochegkeet beim Staat géif opmaachen.

Obwuel d'Regierung probéiert huet, dës duerch Amendementer ze präziséieren, gouf schlussendlech decidéiert, dës Ännerung net méi an d'Gesetz anzuschreiwen, fir méiglech Onkloerheeten ze vermeiden.

D'Staatsbeamtekummer huet op eng méiglech Ongerechtegkeet higewisen, déi duerch déi nei Reegulung an hiren Aen entstoe kéint. Bis elo war d'Waardezäit vu 15 Joer fir vill Employés d'État ze laang, dowéinst hu verschidde Mataarbechter schonns no 9 oder 10 Joer decidéiert, de Wee iwwer e Congé sans solde anzuschloen. Si hunn dann en neie Stage ugefaangen, obwuel dat dacks mat finanziellen Abousse verbounne war.

Och wann een d'Gefill vun der Ongerechtegkeet an dësen Eenzelfall novollzéie kann, gëtt d'Verkierzung vun 15 op 10 Joer als e weesentleche Schrëtt no vir ugesinn, deen d'Allgemengheet begünstegt.

Här President, Dir Dammen an Dir Hären, fir all weider Detailer verweisen ech op mäi schrëftleche Rapport. Ech soen Iech villmools Merci fir Är Opmierksamkeet a soen elo dann nach e puer Wuert als Vertrieeder vun der CSV-Fraktioun.

Discussion générale

Här President, Dir Dammen an Dir Hären, fir d'CSV ass et kloer, dass d'Fonction publique ee vun de Piliere vun eisem Staat ass. Si leescht oft mat vill manner Leit déi gläich Aarbecht wéi hir Homologen am Ausland, déi oft zu vill méi sinn, fir déi selwecht Dossieren ze trahéieren.

D'Fraen an d'Männer, déi am Dénagscht vum Staat schaffen, droen eng grouss Verantwortung: Si halen d'Verwaltung um Lafen, si garantéieren d'Kontinuitéit vum Service public a si maachen, datt d'Politik, déi mir hei am Haus decidéieren, och wierklech bei de Biergerinnen an de Bierger ukënn. D'Ministèren an d'Verwaltungen sinn oft de Servicepartner vun de Gemengen a vun de Bierger.

Eise Staat ass nëmmen esou staark wéi déi Leit, déi hien droen. Wa mir haut iwwert dës Gesetzesprojet diskutéieren, geet et ëm d'Fro: Wéi kënnen mir als Staat en attraktive Patron bleiwen a gläichzäiteg eis un d'Realitéiten upassen? Mat der Ëmsetzung vun de Punkten 3 a 4 aus dem Gehälteraccord maache mir haut e weidere Schrëtt an dës Richtung.

Och wa mir net all eenzelne Spezialfall aus der Vergaangenheet réckwierkend kënnen opfänken, ass dës Projet dach awer e grouss Schrëtt no vir. Mir schafen e fairen, transparente System, deen de Mataarbechter Respekt weist an d'Gerechtegkeet an der Fonction publique stäerkt.

Dës Gesetz ass e kloert Zeechen un all d'Mataarbechter: Mir brauche si, mir schätze se a mir moderniséieren de Staat zesumme mat hinnen am Sënn vun de Bierger. Et ass e Projet, deen an der Logik vun der

weiderer Moderniséierung vun der Fonction publique erakënn.

D'CSV ass iwwerzeegt, dass dës Gesetzesprojet zu enger méi harmoniséierter, méi attraktiver a méi zougänglecher Fonction publique bäidréit. Dofir recommandéieren ech och menger Fraktioun, haut dësem Projet mat Freed zoustëmmen.

Ech soen Iech villmools Merci fir d'Nolauschteren.

Plusieurs voix | Très bien!

M. Claude Wiseler, Président | Villmools merci och, Här Rapporteur, fir Äre schrëftlechen a fir Äre mündleche Rapport. An deen éischten ageschriwwene Riedner ass den Här Gusty Graas. Här Graas, Dir hutt d'Wuert.

M. Gusty Graas (DP) | Merci, Här President. Effektiv begrësse mir och am Numm vun der Demokratescher Partei d'Ëmsetzung hei vun de Punkten 3 a 4 vum Accord salarial vum 29. Januar 2025. Erlaabt mer, trotzdeem déi eng oder déi aner Remark awer zu dësem Projet de loi ze maachen.

Fir d'éischt geet et jo effektiv drëms, déi Zäit vu 15 op 10 Joer erofzesetzen, wou den Employé d'Méiglechkeet kritt, da fonctionnariséiert ze ginn. Mir mussen awer och elo ganz éierlech do sinn. Ech mengen, den Här Rapporteur, den Här Bauer, deem ech och Merci soen, huet zu Recht gesot, mir solle kucken, e moderne Staatsapparat opzebauen. An dat si mer och amgang. Allerdéngs mengen ech och, datt et gewësse Limite gëtt.

Wa mer elo vu 15 op 10 Joer erofginn, da muss een och bedenken, datt deen Ecart zwëschen Employé a Fonctionnaire ëmmer méi kleng gëtt. Mir wëssen, datt et net ëmmer esou einfach ass, Leit kënnen ze rekrutéieren, déi wëlle Fonctionnaire ginn, well dat eeben och mat Examen verbounnen ass.

Elo kann een natierlech d'Fro stellen, ob net d'Attraktivitéit fir de Fonctionnaire am Endeffekt elo méi kleng gëtt. Wann ee seet: „Ech kann no 10 Joer souwiesou fonctionnariséiert ginn“, dann hëlt ee vläicht déi Strapaze vum Examen net onbedéngt op sech.

Duerfir mengen ech also, datt mer awer hei elo eng gewësse Limite erreecht hunn an net nach eng Kéier sollen deen Dossier opmaachen an nach eng Kéier sollen erfoegen, well soss kënn déi Diskussioun do awer ëmmer vill méi op.

Dann nach eng zweet Remark: Et war jo ursprénglech virgesinn an dem Projet vun der Regierung, datt am Fond geholl déi Compétences linguistiques och sollte reduzéiert ginn. Och do wëll ech awer drop hiweisen, datt mer mussen virsiichteg sinn.

Ech hu Verständnis, datt et eng Rei Fonctiounen beim Staat, bei de Gemenge gëtt, wou mer mussen vu bausse Leit rekrutéieren, déi natierlech der Lëtzeburger Sprooch, der däitscher Sprooch oder der franséischer Sprooch net mächtig sinn. An awer befanne mer eis hei nach ëmmer an der Fonction publique. An ech verweise virun allem och op d'Gemengen, d'Gemengen, wou ganz vill Beamten am direkte Kontakt mat dem Bierger sinn. Dowéinst mussen mer hei awer och virsiichteg sinn, datt mer déi Compétences linguistiques net ze vill reduzéieren.

Une voix | Très bien!

M. Gusty Graas (DP) | Ech verstinn engersäits, wat d'Compétences rédactionnelles ubelaangt, datt déi natierlech lues a lues och kënnen duerch KI ersat ginn. Och doriwwer solle mer mol eng Diskussioun féieren, ob dat net och am Endeffekt méi negativ Konsequenzen huet.

Mee et geet hei virun allem awer och ëm déi verbal Kommunikatioun. An dowéinst mengen ech och – an

ech kann dat och am Numm vu menger Partei soen –, datt mer do sollen awer virsiichteg sinn, wat eeben, wéi gesot, déi Reductioun do ubelaangt.

Dat ass an dësem Projet elo net zréckbehalte ginn. Mir begrëssen dat och. Den Optrag, wéi gesot, vläicht un d'Regierung, sech net onbedéngt ze vill Gedanken ze maachen, datt an Zukunft eeben déi Demande, datt ee muss déi dräi Sproochen kënnen, soll ze vill verwässert ginn.

An deem Sënn sti mer, wéi gesot, mat deene puer Remarken trotzdeem hannert deem Gesetz. An ech géing och da menger Fraktioun proposéieren, dës Gesetz ze stëmmen.

Ech soen Iech Merci.

M. Claude Wiseler, Président | Merci, Här Graas. Den Här Polidori huet d'Wuert.

M. Ben Polidori (LSAP) | Jo, merci, Här President. Den Här Rapporteur huet quasi alles gesot zum Gesetz. Mir wäerten dat och matstëmmen.

Just awer eng Remark och zu deem, wat mer de 26. Mäerz och beschwat hunn an der Kommissioun a wat och d'Kollegen, den Här Bauler an och den Här Cruchten, d'Regierung, den Här Minister, gefrot hunn iwwert déi gewëssen Ongerechtegkeeten, op déi och d'Chambre des Fonctionnaires et Employés publics higewisen huet, wou déi Leit schonn an där Period sinn, wou se effektiv hire Congé sans solde geholl hunn, fir eebe schonn éischter Fonctionnaire ze ginn. Do hat Der gesot, Här Minister, dass dat an der Moyenne esou beim néngten, zéngte Joer wier. Do hate mer doriwwer diskutéiert, fir awer ze probéieren, deene Leit entgéintzekomme mat enger Disposition transitoire.

Do fanne mer et awer e bësse schued, dass mer ... Eischters emol hate mer Zuele gefrot, wivill Leit dat wieren. Do hat Der eis an der Kommissioun gesot, Dir géift eis déi liwweren. Déi hutt Der eis awer leider net geliwwert bis haut. Dat heescht, nach eng Kéier da meng Fro: Hutt Dir déi Zuelen, wivill Leit dat sinn?

An op där anerer Säit fannen ech awer schued, dass mer net probéiert hunn, zesummen do awer eng Lösung ze fannen, fir dass och déi Leit, déi haut an deem Fall sinn, awer net mussen do nach weider waarden, well allegueren déi aner jo automatesch elo an dee Benefiss géife kommen. Bon, nichtsdestotrotz wäerte mer dës Projet awer matdroen, well en awer Positives fir d'Fonctionnaires an d'Employée bäidréit.

Merci.

M. Claude Wiseler, Président | Merci, Här Polidori. Här Lemaire.

M. Michel Lemaire (ADR) | Villmools merci, Här President. Mir wäerten eis Zoustëmmung zu dësem Projet mat Freed ginn. Aneschers wéi initial virgesinn, ass op Drock vun der Staatsbeamtekummer dann awer decidéiert ginn, déi staark sproochlech Kompetenzen, dorënner am Lëtzebuergeschen, bäizebehalen.

Ech denken och, dass mer hei, wa mer esou eppes ëmsetzen, ëmmer no um Accord salarial sollte bleiwen an net duerch d'Hannerdier iergendwéi eng Schwächung vun eise sproochleche Kompetenze virhuelen. Dat ass fir eis och net verständlech. Ech mengen, eis Verwaltung stinn am Dénagscht vum Bierger. An hei ass Sprooch, Kommunikatioun, Verstane ginn den A an O. An ech denken, eng staark Fonction publique steet a fält och mat staarke sproochleche Kompetenzen, dorënner am Lëtzebuergeschen. An als ADR wäerte mir eis ëmmer dofir asetzen, datt dat och esou bleift.

Ech soen Iech Merci.

Plusieurs voix | Très bien!

M. Claude Wiseler, Président | Merci, Här Lemaire. Madamm Bernard.

Mme Djuna Bernard (déi gréng) | Jo, merci, Här President. Jo, dëst ass e wichtege Deel aus dem Gehälteraccord, dee mir als Gréng ausdrécklech ënnerstëtzen. Et ass e wichtege a konkreete Schrëtt, fir eis Fonctioun publike méi attraktiv, méi gerecht an och méi modern ze maachen. Mir begrësse souwuel d'Mesür, dass d'Employéë vum Staat no 12 Joer respektiv ab 55 Joer Zougang zum Pensiounsregime vun de Fonctionnairë kréien, sou wéi den Här Rapporteur dat schonn erkläert huet. Dat ass ganz kloer eng Verbesserung vun der sozialer Sécherheet a schafft och méi Perspektive fir vill Mataarbechter. An zweetens ass et och ganz positiv, dass den Delai fir d'Fonctionnarisation vu 15 op 10 Joer reduzéiert gëtt. Dat ass e staarkt Signal un allegueren déi Leit, déi sech laangfristeg am Déngscht vum Staat engagéieren. Et erkennt hir Aarbecht un a mécht och de Beruff méi attraktiv fir weider Kandidaten. An deem Sënn kann ech d'Zoustëmmung vun déi gréng ginn.

M. Claude Wiseler, Président | Merci, Madamm Bernard. Här Wagner.

M. David Wagner (déi Lénk) | Merci, Här President. Jo, mir ginn och eis Zoustëmmung zu dësem Projet de loi, well mer et och esou gesinn, dass et awer zu enger Stärkung vun der Fonctioun publike an deementsprechend och vum Service public féiere kann, dass et och méi séier ka goen, fir an d'Fonctionnaireskarriär ze kommen. Dat ass eppes, wat mir begrëssen, wat mir jo och ëmmer gefuerdert hunn.

Ech soen Iech Merci.

M. Claude Wiseler, Président | Merci, Här Wagner. Domat wär d'Lëscht vun de Riedner ofgeschloss.

D'Regierung hätt d'Wuert, den Här Minister fir d'Fonctioun publike.

Prise de position du Gouvernement

M. Serge Wilmes, Ministere de la Fonctioun publike | Merci villmools, Här President. Merci dem Rapporteur fir säi Rapport. Merci all den Deputéierte fir hir Interventiounen a virun allem dann och fir den Accord zu dësem Projet de loi, deen déi Punkten 3 a 4 wäert ëmsetzen. Mir huelen natierlech och déi Remarken zur Kenntnis, déi gemaach gi si vun Iech allegueren.

Den Här Polidori hat nach no Zuele gefrot. Meng Informatioun ass, dass déi u sech weidergaange sinn un d'Kommissioun. Elo weess ech net, ob dat dann net awer geschitt ass. Ech soen Iech awer, wat déi Zuele sinn, déi mer hunn. Dat heescht, fir déi zwee Cas-defiguren ass et esou, dass ronn 1.000 Employéen an de Régime de pension vun de Fonctionnairë falen an ongeféier 1.100 Employéen déi nei Konditiounen, fir fonctionnarisiéiert ze ginn, erfëllen. Also 1.000 géifen dorënner falen, an de Régime de pension vun de Fonctionnairë ze kommen, an 1.100 kënnen d'Konditiounen erfëllen, fir fonctionnarisiéiert ze ginn.

Jo, déi Fro mat der Transitionphas, dat hate mer kuerz diskutéiert an der Kommissioun. Dat ass net esou während dem Accord salarial diskutéiert ginn. Natierlech kéint een ëmmer nach esou eppes virgesinn, mee dat géif och ëmmer aner Ongerechtegkeete schafen. Iergendwou ass ëmmer e Stréch, deen een zitt, an da sinn der, déi erfëllen dat do kuerz virdrun oder si erfëllen et kuerz duerno net. Dat ass einfach esou.

An ech mengen, dat Wichtegst ass, dass d'Chamber dat heiten elo unhëlt, fir dass an Zukunft déi Reegel esou ass, dass een no zéng Joer ka fonctionnarisiéiert ginn. Déi, déi elo just do dra sinn am Stage, bon, dat ass da fir si net méiglech. Déi maachen dann de

Stage, fir Fonctionnaire ze ginn. Mee ab elo ass dat heiten déi nei Dispositioun. An och wann een eng Transitionphas gemaach hätt, da wäeren erëm do eng gewëssen Zuel vu Leit net drënnergefall. Et kann een dat net ëmmer esou gerecht maachen. An et ass och, wéi gesot, net e Bestanddeel gewiescht vun den Diskussiounen mat der CGFP. Mir hunn eis also fidèlement dorunner gehalen a wäerten dat dann esou an der Zukunft ëmsetzen.

An ech soen Iech Merci, dass Der Är Zoustëmmung dofir gitt.

M. Claude Wiseler, Président | Merci, Här Wilmes. Ech hunn nach eng Wuertmeldung vum Här Polidori. Här Polidori.

M. Ben Polidori (LSAP) | Jo, merci, Här President. Jo, Här Minister, just fir kloerstellen: Mir kruten déi doten Zuelen, déi Dir elo genannt hutt. Déi hu mer kritt. Mee d'Fro war jo och déi: Déi Leit, déi am Moment an där Prozedur sinn, déi Employéepublischen, déi elo de Congé sans solde ugefrot hunn, fir eebe Fonctionnaire ze ginn, dat, mengen ech, ware jo eeben och déi Zuelen, déi mer wollten hunn, fir eebe genau driwwer ze diskutéieren, iwwert déi Ongerechtegkeeten, déi am Raum stinn, wivill Leit dat iwwerhaupt wieren. An déi Zuelen, déi hu mer bis haut, mengen ech, nach net kritt. An dat sinn déi, op déi ech am Fong erauswollt, déi nach géife feelen.

Merci.

M. Claude Wiseler, Président | Ok, merci, Här Polidori. Domat wär d'Diskussioun ofgeschloss.

Éier mer zur Ofstëmmung kommen, vu dass ech hei gesinn, dass nach eng ganz Rei Leit net agelogg sinn, géng ech Iech bidden, dat ze checken an d'Alloggen elo direkt ze maachen, fir dass mer och kënnen en bonne et due forme ofstëmmen. Sidd Der alleguer prett?

(Assentiment)

Da komme mer zur Ofstëmmung iwwert de Projet de loi 8524. Den Text steet am Document parlementaire 8524⁹.

Vote sur l'ensemble du projet de loi 8524 et dispense du second vote constitutionnel

Ech maachen d'Ofstëmmung op. De Quorum ass erreecht. Vote par procuration. An de Vott ass ofgeschloss.

D'Resultat vum Vott ass: 60 Jo-Stëmmen, keng Nee-Stëmm, keng Abstentioun. Dëse Projet de loi ass also eestëmmeg mat 60 Jo-Stëmmen ugeholl.

Ont voté oui : Mmes Diane Aehm, Nancy Arendt, MM. Maurice Bauer, Jeff Boonen, Alex Donnersbach (par M. Laurent Mosar), Emile Eicher, Félix Eischen (par M. Ricardo Marques), Paul Galles (par M. Maurice Bauer), Mme Françoise Kemp, MM. Marc Lies, Ricardo Marques, Georges Mischo, Mmes Octavie Modert, Nathalie Morgenthaler, MM. Laurent Mosar, Jean-Paul Schaaf, Charles Weiler (par Mme Nathalie Morgenthaler), Mme Stéphanie Weydert, MM. Claude Wiseler, Michel Wolter et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering (par M. Gusty Graas), Patrick Goldschmidt (par M. André Bauler), Gusty Graas, Marc Hansen, Mmes Carole Hartmann, Mandy Minella, Lydie Polfer et M. Gérard Schockmel ;

M. Dan Biancalana (par M. Yves Cruchten), Mmes Taina Bofferding (par M. Ben Polidori), Liz Braz, Francine Closener, M. Yves Cruchten, Mme Claire Delcourt, MM. Mars Di Bartolomeo, Georges Engel (par Mme Liz Braz), Franz Fayot, Claude Haagen, Mme Paulette Lenert et M. Ben Polidori ;

MM. Dan Hardy, Fred Keup, Michel Lemaire, Mme Alexandra Schoos et M. Tom Weidig ;

Mme Djuna Bernard, M. Meris Sehovic, Mmes Sam Tanson et Joëlle Welfring (par Mme Djuna Bernard) ;

MM. Sven Clement et Marc Goergen ;

MM. Marc Baum (par M. David Wagner) et David Wagner.

Freet d'Chamber d'Dispens vum zweete Vote constitutionnel?

(Assentiment)

Dann ass dat esou decidéiert.

3. 8541 – Projet de loi portant modification :

1^o de la loi modifiée du 16 avril 1979 fixant le statut général des fonctionnaires de l'État ;

2^o de la loi modifiée du 25 mars 2015 fixant les conditions et modalités de l'accès du fonctionnaire à un groupe de traitement supérieur au sien et de l'employé de l'État à un groupe d'indemnité supérieur au sien,

en vue de la mise en œuvre des points 11 et 13 de l'accord salarial dans la Fonctioun publike du 29 janvier 2025

Als zweete Punkt op eise Ordre du jour vun de Moie steet de Projet de loi 8541 iwwert d'Ëmsetze vun de Punkten 11 an 13 vum Accord salarial am effentlechen Déngscht vum 29. Januar 2025. D'Riedezäit ass hei och e Basismodell. Ageschriwwen si schonn: den Här Georges Mischo, den Här Gusty Graas, den Här Ben Polidori, den Här Michel Lemaire, d'Madamm Djuna Bernard an den Här David Wagner. An d'Wuert huet elo de Rapporteur vum Projet de loi, den honorabelen Här Georges Mischo. Här Mischo, Dir hutt d'Wuert.

Rapport de la Commission de la Fonctioun publike

M. Georges Mischo (CSV), rapporteur | Merci, Här President. Léif Kolleeginnen a Kolleegen, mir stëmmen haut de Projet de loi 8541, nach eng weider Ëmsetzung vum Accord salarial. Konkreet geet et ëm d'Punkten 11 an 13 aus deem Gehälteraccord.

Dëse Projet de loi gouf de 15. Mee 2025 vum Serge Wilmes, Ministere fir d'Fonctioun publike, an der Chamber deposéiert. De Gesetzesprojet war begleet vum engem Exposé des motifs, engem Commentaire zu den Artikelen, enger Fiche financière souwéi enger Fiche iwwert d'Auswirkungsanalys an engem Nohaltegkeetscheck. Dem Regierungstext war och e koordinéierten Text vum geännerte Gesetz vum 16. Abrëll 1979 iwwert de Statut général vun de Fonctionnaires de l'État a vum geännerte Gesetz vum 25. Mäerz 2015 iwwert d'Konditiounen an d'Modalitéite vum Accès vum Fonctionnaire an e méi héije Groupe de traitement a vum Employé an eng méi héich Indemnitéitsgrupp bäigefüügt, déi heimat geännert solle ginn.

De Gesetzesprojet gouf de 5. Juni 2025 un d'Kommissioun verwisen. D'Chambre des Fonctionnaires et Employés publics huet hiren Avis den 11. Juli 2025 ofginn. De Staatsrot sengersäits huet säin Avis den 3. Februar 2026 ofginn. D'Kommissioun krut de Gesetzesprojet an hirer Sëtzung vum 26. Februar 2026 presentéiert an huet mech zum Rapporteur vun dësem Gesetzesprojet ernannt. Während der selwechter Sëtzung huet d'Kommissioun d'Avis vun der CHFEP a vum Staatsrot gepréift. Dëse Projet de rapport gouf ofschléissend de 26. Mäerz 2026 vun der Kommissioun ugeholl.

Dëse Gesetzesprojet huet zum Zil, d'Punkten 11 an 13 vum Gehälterofkommen am effentlechen Déngscht vum Staat vum 29. Januar 2025 ëmzesetzen.